

LA MADONNA DEL PORTO DI CHIOGGIA

Andando o ritornando via da Chiòsa
seguendo, ben s'intende, i so canali,
s'incontre un'Immagine gloriosa
che g'ha per piedestallo quattro pali.

De sora del so capo un gran zogèlo
ghe done l'aria de 'na gran Regina;
la pare 'na vision vegnua dal Cielo,
a benedir sia Chiòsa che Marina.

L'ha messa un ài lontano i pescaori,
volendo che ghe fusse anche in laguna
un regno de l'amore dei so cuori,
verso la Madre "bella come luna".

Splendente de bianchissimo candore
no l'ha inneria la piova nè 'l caligo,
nè i s-cianti delle barche col motore:
la xé perfin visibile da Vigo.

Ghe passe a rente barche co le véle,
i grandi mercantili da trasporto,
e sandoli e verigole e babèle;
la xé per chi che crede un gran conforto.

I oci sollevai se sotto el velo,
le mani zonte in fervida preghiera:
ghe dixè a tutti che la via del cielo
no xé, come che i pense, 'na chimera.

A tutti la ghe dixè 'na parola
a quei che passe lieti e ai desperai;
i pescaori stracchi la consola,
la guide come un "faro" i marinai.



E quando el sol tramonte all'orizzonte
xe come se a volesse col se raggio
accendarghe 'na luce su la fronte
come ultimo saluto e come omaggio.

Anche de notte, quando tutto tase,
la gégie all'erta come sentinella
e luce la ghe mande per le case
de chi che la salude "Maris Stella".

Esseci

Assunta 1979

Ai soci del Circolo Nautico Chioggia
la cui attività sportiva si svolge
continuamente attorno alla
sacra figura della Madonna del
Porto, eretta dai pescatori (di cui
ero Cappellano) il 5 maggio 1958,
con tanti auguri
Giuseppe